

BESTELAKO XEDAPENAK

KULTURA SAILA

2938

AGINDUA, 2012ko ekainaren 12koa, Kulturako sailburuarena, Euskadiko Irakurketa Publikoko On Line Sareko liburutegi publikoetan teknologia berriak ezartzeko edo/eta garatzeko diru-laguntzak emateko modua arautu eta diru-laguntza horietarako deia egiten duena.

Euskadiko liburutegiei buruzko urriaren 26ko 11/2007 Legearen bitartez sortutako Euskadiko Irakurketa Publikoko Sareari dagokio, besteak beste, liburutegientzat laguntza-programak eta zerbitzuak jartzea, bereziki informatika-sareak osatzeko, irakurzaletasuna eta liburutegien erabilera sustatzeko kanpainak antolatzeke, funtsak eskuratzeko eta beste helburu batzuetarako.

Bestalde, Kultura Sailaren egitura organikoa ezartzen duen martxoaren 22ko 45/2011 Dekretuaren arabera, Liburutegi Zerbitzuaren eskumena da Euskadiko Irakurketa Publikoko Sareari dagozkion egitekoak garatu eta gauzatzea, bai eta ondare bibliografikoaren eta liburutegien alorrean diren beharrak aztertzea eta arauzko neurriak proposatzea eta liburutegien eta ondare bibliografikoaren alorreko politika kudeatzea, horretarako beharrezko diren proiektuak sustatuz, bultzatuz eta zuzenduz.

Hori dela eta, udal liburutegi publikoen helburua gogoan, herritar orok ezagutza eta informazioa jasotzeko duen eskubidea, eta teknologia berriek horretan duten garrantzia, Kultura Sailak uste du beharrezkoa dela teknologia horiek udal liburutegi publikoetan ezartzeko eta garatzeko lagundu dezaketen jarduerak bultzatzea.

Ondorioz, hauxe

EBAZTEN DUT:

1. artikulua.— Xedea.

Agindu honen bidez, Euskadiko Irakurketa Publikoko On Line Sareko udal liburutegi publikoen arloko eskumenak dituzten edo arlo horretako egitekoak esleituta dituzten Udal eta Toki Erakundeei 2012ko ekitaldian diru-laguntzak emateko modua arautzen da. Diru-laguntza horiek teknologia berriak ezartzeko eta/edo garatzeko izango dira.

2. artikulua.— Diru-baliabideak.

Agindu honen bidez araututako diru-laguntzetarako 354.400 euro erabiliko dira, gehienez.

3. artikulua.— Izapidetze elektronikoa.

Erakunde interesdunek bitarteko elektronikoak erabili ahal izango dituzte prozedura honetako izapideak eskatzeko, kontsultatzeko eta bideratzeko.

Izapidetze elektronikoa honako lege-arau hauetan araututa dago: otsailaren 21eko 21/2012 Dekretua, Administrazio Elektronikoari buruzkoa; 2008ko apirilaren 29ko 72/2008 Dekretua, Euskal Autonomia Erkidegoko Administrazio Orokorraren eta bere erakunde autonomiadunen erregistroen sorrera, antolaketa eta funtzionamenduari buruzkoa; eta e-Administrazioarako Plataforma

Teknologikoa –PLATEA– ezartzen duen Informatika eta Telekomunikazioetako zuzendariaren 2006ko otsailaren 9ko Ebazpena.

Eskaerak, erantzukizunpeko adierazpenak eta gainerako ereduak –bai bide presentziala erabiliz, bai bide elektronikoa erabiliz– nola izapidetu behar diren azaltzen dituzten argibideak honako helbide honetan daude ikusgai:

https://www.euskadi.net/y22-izapide/eu/contenidos/ayuda_subvencion/12_ltb/eu_dirulag/dirulag.html).

Eskabidea egiteko eta dokumentazioa aurkezteko bide horietako bat –presentziala edo elektronikoa– erabiltzeak ez du esan nahi bidez aldatu ezin denik prozeduraren ondorengo izapideetan, alegia, edonoiz alda daiteke bidea.

Eskabidearen ondoko izapideak, bide elektronikoa erabiliz, hemen egin daitezke: https://www.euskadi.net/y22-eduki/eu/contenidos/informacion/egoitza_nire_gestioak_laguntza/eu_egoitza/sede_mis_gestiones_ayuda.html.

4. artikulua.– Onuradunak.

1.– Agindu honetako laguntzak jaso ahal izango dituzte Euskadiko Irakurketa Publikoko On Line Sarearen barruan dauden –edo eskabideak aurkezteko epea amaitu aurretik sare horretan sartzeko eskaera eginda duten– udal liburutegi publikoen arloko eskumenak dituzten edo arlo horretako egitekoak esleituta dituzten Udal eta Toki Erakundeek.

2.– Ezingo dute diru-laguntzarik eskatu laguntza publikoak lortzeko zehapen administratibo edo penalik duten erakundeek, ezta ere horretarako gaitasuna kentzen dien legezko debekurik dutenek ere. Halaber, ezingo dute agindu honetako diru-laguntzarik eskatu, kasuan kasuko zehapenak ezarritako epean, sexu-bereizkeria dela-eta zehapen administratibo edo penalik duten pertsona fisiko zein juridikoek, ezta Emakumeen eta Gizonen Berdintasunerako otsailaren 18ko 4/2005 Legearen indarrez jarritako isunen ondorioz debekua dutenek ere.

3.– Euskal Autonomia Erkidegoko administrazio orokorrak edo erakunde autonomiadunek ezaugarri bereko beste laguntzaren batzuk eman izana dela-eta, horiek itzultzeko edo zehatzeko prozesuren bat oraindik ere izapidetzen ari bada, prozesu hori amaitu egin beharko da onuradunei laguntzak eman edo ordaindu ahal izateko.

5. artikulua.– Diruz lagun daitezkeen jarduera eta gastuak.

1.– Honako jarduera hauek finantzatu ahal izango dira: Euskadiko Irakurketa Publikoko On Line Sareko liburutegi publikoetan teknologia berriak ezartzeko edo/eta garatzeko elementuak eskuratu eta ezartzeko egiten diren jarduerak, zehazki, 2012. urtean egiten direnak.

2.– 2012. urtetik hara zabaltzen diren inbertsio-proiektuetako zati bat diren inbertsio-jarduerak finantzagai izango dira, baldin eta 2012. urtean gauzatzen badira, erabilera beregaina dutela jotzen bada, eta haien banakako kostua zehaztu ahal bada.

3.– Zehazki, honakoak eskuratzea edota instalatzea izango da laguntzagai:

a) Hardware edo euskarri fisikoa. Ordenagailuak eta bere osagaiak sartzen dira bertan, bai eta funtzionamendurako edo erabilerarako beharrezkoa den beste edozein elementu material ere, dela modu autonomoan lanean dihardutela, dela sarean dihardutela (mahaigaineko ordenagailuak, ordenagailu eramangarriak, pdak, eskanerra, pantaila lauak, periferikoak, routerrak, biltegitratze unitateak, txartel grafikoak, saguak, aurikularrak, inprimagailuak, eta abar).

b) Software edo informatika sistemen euskarri logikoa. Alegia, halako ataza zehatz bat egiteko beharrezkoak diren programa eta prozeduren multzoa. Horretarako, liburutegi-kudeaketarako sistemak ez diren sistemen softwarea eta aplikazioen softwarea sartzen dira atal honetan.

c) Telekomunikazioak. Komunikazio-sareak instalatzea, bai kableatuak, bai haririk gabekoak.

4.– Ondorengoak joko dira agindu honetan jasotako araudiaren babesean diruz laguntzeko moduko gastutzat: aurkeztutako eskabidean jasota egonik, diruz laguntzeko jarduerarekin lotura estua dutenak; bai erosketatik eratortzen direnak, bai errentamendutik edo laguntzeko moduko elementuen benetako erabilgarritasuna bermatzen duten bestelako sistemetatik eratortzen direnak.

5.– Ez dira diruz lagunduko:

a) Ikus-entzunezko edo bestelako ekipamenduak, beren ezaugarriak direla-eta 3. puntuko ezein ataletan sartzen ez badira.

b) Mantentze-lan, laguntza tekniko edo aholkularitza moduan definitzen diren zerbitzuen kostuak.

c) Liburuzainak edo erabiltzaileak tresna berrietan trebatzeko prestakuntza-ikastaroak.

d) Liburutegien presentzia Interneten areagotzeko asmo hutsez bideratutako software eta gainerako elementuak.

e) Liburutegiarentzako funtsak eskuratzea, loturarik ez badago euskarri, lokalizazio eta edukietan sartzeko beharrezko ekipamenduarekin.

6. artikulua.– Erakunde eskatzaileen betebeharrak eta baldintzak egiaztatzea.

1.– Erakunde eskatzaileak baimena eman ahal izango du laguntzak kudeatzen dituen organoak gainerako datu edo dokumentuak eskuratu edo egiaztatu ditzan, bai bide presentziala erabiltzen denean bai elektronikoa erabiltzen denean ere, Administrazio Publikoak egiaztapen, kontrol eta ikuskaritzaren alorrean dituen eskumenen kalterik gabe.

2.– Euskal Autonomia Erkidegoko Herri Ogasun Nagusiaren Antolarauei buruzko Legearen Testu Bateginak ezartzen duenaren arabera (1997ko azaroaren 11ko 1/1997 Legegintzako Dekretuak onartua), eskabidean sartuko den erantzukizunpeko adierazpen bidez egiaztatuko dira honako betebeharrak hauek:

– Xede bera duten eta bestelako administrazio edo erakunde publiko zein pribatuei eskatutako –eta, hala badagokio, haietatik jasotako– diru-laguntza, laguntza, diru-sarrera edo baliabideen berri ematea.

– Ez egotea dirua itzultzeko prozedura batean edo zehapen-prozedura batean sartuta, edo horrelakorik izanez gero, amaituta izatea.

– Pertsona edo erakunde eskatzaileak ez izatea zehapen administratibo edo penalik laguntza publikoak lortzeko, ezta ere horretarako gaitasuna kentzen dion legezko debekurik.

– Erakunde eskatzaileak eskabidean eta dokumentazioan jasotako datuak egiazkoak direla adieraztea, eta laguntza hauen onuradun izateko indarrean den araudian ezarritako betekizunak konplitzen dituela adieraztea.

3.– Erregistratu gabe badago Ekonomia eta Ogasun Saileko Hirugarrenen Erregistroan, edota Erregistroan dauden bere bankuko datuak aldatu nahi baditu:

– bide presentziala erabiliz: http://www.ogasun.ejgv.euskadi.net/r51-341/eu/contenidos/autorizacion/alta_terceros/eu_7999/adjuntos/alta%20de%20TERCERO.pdf helbidean dagoen inprimakia.

– bide elektronikoa erabiliz.

7. artikulua.– Eskabideak eta formularioak aurkeztea.

a) Deialdi honetarako eskabideak aurkezteko epea hilabetekoa izango da, Euskal Herriko Agintaritzaren Aldizkarian argitaratu eta hurrengo egunetik hasita.

b) Eskabideak behar bezala beteriko eskaera-orri normalizatu baten bidez aurkeztuko dira, Herritarrentzako Arreta Bulegoetara, Lurralde Ordezkaritzetara, Eusko Jaurlaritzaren erakunde laguntzaileetara edo Kultura Sailaren lurralde-zerbitzuetako edozeinetara bertaratuta, edo azaroaren 26ko 30/1992 Legearen 38.4 artikuluan ezarritako edozein bidetatik (30/1992 Legea, azaroaren 26koa, Herri Administrazioen Araubide Juridikoari eta Administrazio Prozedura Erkideari buruzkoa). Eskabide-eredua agindu honen 3.3 artikuluan adierazitako egoitza elektronikoan eskura daiteke.

c) Eskabideak bide elektronikoa erabiliz ere aurkez daitezke, zehazki, agindu honen 3. artikuluan adierazitako egoitza elektronikoaren bidez: <https://www.euskadi.net/y22-home/es>.

d) Erakunde eskatzaileek nahi duten hizkuntza ofizialean aurkeztu ahal izango dute eskaera, bai eta atxikitako dokumentazioa ere. Halaber, erakunde eskatzaileak aukeratzen duen hizkuntza hori erabiliko da prozedura osoan, Euskararen Erabilera Normalizatzeko azaroaren 24ko 10/1982 Oinarrizko Legeko 5.2.a) eta 6.1 artikuluek xedatzen duten moduan.

Bide presentziala zein telematikoa erabiliz bidaltzen den eskabideari jarraian adierazten den dokumentazioa erantsi behar zaio:

1.– Erakunde eskatzaileko teknikari arduradunek sinatutako txosten bat, 2012. urteko ekitaldian egindako edo egin beharreko jarduerak –laguntzagai direnak– azaltzen dituen, baita ere erosketa/instalazioarekin lortu nahi diren helburuak, eta haien beharraren justifikazioa.

2.– 2012. urtetik hara zabaltzen diren inbertsio-proiektuen zati diren inbertsio-jarduerak badira, haien banakotasuna egiaztatu beharko da, baita erabilera beregaina izan dezaketela eta haien banakako kostua zehaztu ahal dela ere. Kasu horretan, eskabidea jarduera horietara mugatuko da.

3.– Ondasunak edo instalazioak jartzen dituzten enpresa hornitzaileen aurrekontuak, jardueretan aurreikusitako gastua justifikatuko dutenak.

8. artikulua.– Diru-laguntzak kudeatzeko organoa.

Kultura Ondarearen Zuzendaritzari dagokio agindu honen bidez araututako diru-laguntzak kudeatzeko egin beharrekoak egitea.

9. artikulua.– Akatsak zuzentzea.

Eskabidearen tramitea onartzeko beharrezkoa den dokumenturik falta bada edo dokumentu horietan zerbait gaizki dagoela edo zerbait falta dela ikusten bada, hamar egun balioduneko epea emango zaio interesdunari akatsa zuzentzeko edo aurkeztu beharreko agiriak aurkezteko, eta

ohartaraziko zaio eskatutakoa egiten ez badu, eskabidean atzera egin duela ulertuko dela, aurrez jakinaraziko zaion ebazpen baten bidez, edo dagokion izapidea egiteko eskubidea galduko duela.

10. artikulua.– Eskabideen ebaluazioa.

Kultura Ondarearen Zuzendaritzari dagokio aurkeztutako eskabideak aztertu eta ebaluatzea. Era berean, zuzendaritza horrek osatuko du ebazpen-proposamena eta, ondoren, Kultura, Gazteria eta Kiroletako sailburuordeari igorriko. Bertan azalduko dira, hala badagokio, erakunde onuradun bakoitzari egokitutako diru-kopurua eta emandako diru-laguntzak modu egokian erabiliko direla ziurtatzeko beharrezkotzat jotzen diren baldintza guztiak.

11. artikulua.– Diru-laguntzen zenbatekoa zehazteko irizpideak.

1.– Dauden diru-baliabideak banatuko dira agindu honetan ezarritako eskakizun eta baldintza guztiak betetzen dituzten erakunde eskatzaileen artean.

2.– Eskabide bakoitzari zehatz-mehatz eman beharreko diru-kopurua jakiteko, agindu honen hurrengo paragrafoan finkatutako irizpideak eta kalkulu-sistema aplikatuko dira.

3.– Banatu beharreko diru-kopurua zehazteko, honako irizpide hauek erabiliko dira:

a) Biztanleria irizpidea: erakunde onuradunaren biztanleak hartuko dira kontuan. Horretarako, biztanleen arabera multzoak egongo dira, eta haiei indize homologatu batzuk eta indize zuzentzaile batzuk aplikatuko zaizkie, zeinak handiagoak izango baitira onuradunek biztanle gutxiago jasotzen dituzten heinean.

b) Formulak eta koefizienteak:

Koefizienteak

1.– Biztanleria irizpidea.

a) Herrien homologazioa (P). Erakunde onuradunen herriak biztanle-kopuruaren arabera sailkatu ditugu, eta herrien P balore homologatua lortu dugu, sailkapen honen arabera:

Herria	P
0tik - 1.000ra	1.000
1.001etik 2.000ra	2.000
2.001etik 3.000ra	3.000
3.001etik 5.000ra	5.000
5.001etik 10.000ra	10.000
10.001etik 15.000ra	15.000
15.001etik 20.000ra	20.000
20.001etik 25.000ra	25.000
25.001etik 50.000ra	50.000
50.001etik 100.000ra	100.000
100.001etik 150.000ra	150.000
150.001etik 200.000ra	200.000
200.001etik 250.000ra	250.000
50.000naka jarraitzen du	

Adibideak: 3.248 biztanledun udalerrri bat 5.000 dituenarekin parekatuko da, eta 54.949 biztanledun beste bat, 100.000 dituenarekin.

b) Biztanleria-irizpidea. Koefiziente zuzentzailearen aplikazioa (IZ).

Honako koefiziente zuzentzailea ezarriko da:

Herria	IZ
0tik - 1.000ra	1,8
1.001etik 2.000ra	1,6
2.001etik 3.000ra	1,4
3.001etik 5.000ra	1,2
5.001etik 10.000ra	1
10.001etik 25.000ra	0,8
25.001etik 50.000ra	0,6
50.001etik 150.000ra	0,4
150.001etik 200.000ra	0,3
200.001etik 250.000ra	0,25
250.001etik aurrera	0,2

Formula

P: biztanle-tarteentzako homologatutako biztanle-kopurua.

IZ: indize zuzentzailea.

B: onuradunak jasotako puntuazioa.

BB: onuradun guztien puntuazioen batura, hots, B guztien batura.

DK: diru-baliabide erabilgarriak. Aginduen diru-hornidura 354.400 eurokoa da. Soberakinak banatzeko, agindua aplikatu osteko baliabideak hartuko dira kontuan.

DL: onuradun bakoitzari esleitutako diru-kopurua. Alegia, erabilgarri dagoen kopurua banaka lortutako puntuazioen arabera onuradunen artean zatikatzearen ondorioz eta horrek onuradun guztien puntuazioen multzoarekin duen lotura aintzat hartuta esleitutakoa.

Prozedura honelakoa da:

1.– Onuradun bakoitzari P eta IZ balioak esleitu.

2.– P eta IZ balioen biderkadura. Horretara, onuradun bakoitzaren puntuazioa lortzen da (B).

3.– Onuradun guztien puntuazioen batura, hots, B guztien batura. Emaita BB balioa da.

4.– Onuradun bakoitzari dagokion diru-kopurua, hau da: erabilgarri dauden baliabideak bider onuradun jakin baten puntuazioa, eta emaitza hori onuradun guztien puntuazioen baturaz zatituta. Alegia:

$$DL = DK * B$$

4.– Kalkulatzeko sistema hori aplikatu eta lehenengo emaitzak erakusten badu eskabideren batean gainfinantzaketa egon dela, hasieran esleitutako kopurua murriztuko zaie eskatzaile horiei, eta soberakina gainerako eskatzaileen artean banatuko da, eta behar adina aldiz errepikatuko da

eragiketa hori. Esleitutako kopuruak inola ere ez du gaindituko agindu honetako 12. artikuluan 1. puntuan jasotako muga.

12. artikulua.– Diru-laguntzen zenbatekoak, mugak, ordainketa eta bateragarritasunak.

1.– Jasotako diru-laguntzak ez du gaindituko eskatutako gastuaren % 90, eta inolaz ere ez da izango 100.000 eurotik gorakoa erakunde onuradun bakoitzerako.

Diru-laguntza justifikatzeko eta likidatzeko dokumentazioan ikusten bada baldintza hori ez dela betetzen, diru-laguntza murriztuko da behar den heineraino.

2.– Diru-laguntza zati bakar batean ordainduko da.

3.– Deialdi honetako diru-laguntzak bateragarriak dira beste erakunde publiko zein pribatuek helburu berbererako emandakoekin, betiere gainfinantzaketarik gertatzen ez bada. Gainfinantzaketarik badago, diru-laguntzaren zenbatekoa murriztu egingo da, dagokion gehienezko mugaraino.

13. artikulua.– Ebazpena eta jakinarazpena.

1.– Kultura, Gazteria eta Kiroletako sailburuordeari dagokio, Kultura Ondarearen Zuzendaritzak egingako ebazpen-proposamena ikusita, aurkeztutako eskabideei buruzko ebazpena ematea.

2.– Prozedura ebatzi eta interesdunei horren berri emateko epea sei hilabetekoa izango da, agindu hau argitaratu eta hurrengo egunetik aurrera.

3.– Jakinarazpen-gisa, ebazpena Euskal Herriko Agintaritzaren Aldizkarian argitaratuko da.

4.– Epe hori amaituta, ebazpena jakinarazi ez bada, eskabidea ezetsi egin dela ulertuko ahal izango da, Herri Administrazioen Araubide Juridikoaren eta Administrazio Prozedura Erkidearen azaroaren 26ko 30/1992 Legearen 44.1 artikulua onorioetarako.

5.– Dena den, agindu honetako 9. artikuluan adierazitakoa gertatuz gero, erabakia hartzeko epea etenda geratuko da tramite hark behar duen beste denboraz, jakinarazpen-egunaren eta erantzuteko epearen arabera.

6.– Artikulu honetan adierazten den ebazpenak ez du administrazio-bidea amaitzen, eta, beraz, beraren aurka, gora jotzeko errekurtoa aurkeztu ahalko diote erakunde interesdunek Kulturako sailburuari, jakinarazpena jaso eta hurrengo egunetik aurrera, hilabeteko epean, Herri Administrazioen Araubide Juridikoaren eta Administrazio Prozedura Erkidearen azaroaren 26ko 30/1992 Legearen 114. eta 115. artikuluek ezartzen dutenaren arabera.

14. artikulua.– Diru-laguntza jasotzen duten erakundearen betebeharrak.

Agindu honetan ezarritakoaren arabera araututako diru-laguntzak jasotzen dituzten erakundeek honako betebeharrak izango dituzte:

a) Emandako diru-laguntza onartzea. Alde horretatik, erakunde onuradunek, diru-laguntza eman zaiela aditzera ematen duen jakinarazpena jaso eta hamabost eguneko epean, ez badiote diru-laguntzari espresuki uko egiten, onartu egin dutela ulertuko da.

b) Diru-laguntza agindutako helburu zehatzerako erabiltzea.

c) Kontrol Ekonomikoko Bulegoak, Herri Kontuen Euskal Epaitegiak eta Kultura Sailak –beren zereginetan dihardutela– deialdi honen bidez jasotako diru-laguntzei buruz eskatutako informazioa ematea.

d) Diru-laguntza hauetaz baliatuz egiten diren ekintza eta dokumentazio guztietan, bai eta horien publikitatean ere, Eusko Jaurlaritzako Kultura Saileko Liburutegi Zerbitzuaren laguntza jaso dela agertzea.

e) Emakumeen eta Gizonen Berdintasunerako otsailaren 18ko 4/2005 Legean ezarritakoa betez, hizkera sexistarik ez erabiltzea. Emakumeen eta gizonen rolei dagokienez, erabilera estereotipatuak saihestuko direla bermatuko da.

f) Azaroaren 11ko 1/1997 Legegintzako Dekretuaren bidez onartutako Euskal Autonomia Erkidegoko Herri Ogasun Nagusiaren Antolarauei buruzko Legearen 50.2 artikuluan ezarritako beste edozein betebeharrak.

15. artikulua.– Diru-laguntzaren justifikazioa eta likidazioa.

Diru-laguntza justifikatzeko dokumentuak 2012ko abenduaren 31 baino lehen aurkeztu beharko dira.

Diru-laguntza justifikatzeko dokumentuak Herritarrentzako Arreta Bulegoetara, lurralde zerbitzuetara, Eusko Jaurlaritzaren erakunde laguntzaileetara edo Kultura Sailaren lurralde-zerbitzuetako edozeinetara bertaratuta aurkeztu ahal dira, edo azaroaren 26ko 30/1992 Legearen 38.4 artikuluan ezarritako edozein bidetatik (30/1992 Legea, azaroaren 26koa, Herri Administrazioen Araubide Juridikoaren eta Administrazio Prozedura Erkidearena).

Diru-laguntza justifikatzeko dokumentuak aurkezteko, bide elektronikoa ere erabili ahal izango da, zehazki, agindu honen 3.3 artikuluan adierazitako egoitza elektronikoa.

Justifikazioa egiteko, honako dokumentazio hau aurkeztu behar da:

– Kontu-hartzailearen edo idazkari kontu-hartzailearen egiaztagiria, egindako gastuei buruzkoa eta III. eranskinaren arabera.

– Laguntza emateko ebazpenean eskatzen den beste edozein agiri.

Dokumentazioa jasotakoan edo epea amaitutakoan, Kultura Ondarearen Zuzendaritzak, kasuan kasuko dokumentazioa aztertu ondoren, diru-laguntza ordaintzeko agindua emango du (ordainketa bakarra egingo da), eta, murrizketarik egin behar bada, bakoitzari dagokion likidazioa igorriko dio Kultura, Gazteria eta Kiroletako sailburuordeari. Sailburuordeari baitagokio horren inguruko ebazpena egitea bi hileko epean, justifikazioak aurkezteko epea bukatzen den egunetik hasita.

16. artikulua.– Baldintzak ez betetzea.

Hauek izango dira ez-betetzeak:

1.– Jasotako diru-laguntza osoa edo zati bat agindu honetan adierazitako jardueren bestelakoetan erabiltzea.

2.– Agindu honetan edo laguntza emateko ebazpenean adierazitako betebeharrak ez betetzea.

3.– Legezko beste xedapenen batek ezarritako beste edozein eskakizun orokor bete ez denean.

Ez-betetzaren bat gertatuz gero, jasotako zenbatekoak eta legezko interesak Euskal Autonomia Erkidegoko Diruzaintza Nagusiari itzuli beharko zaizkio, betiere azaroaren 11ko 1/1997 Legegintzako Dekretuaren eta abenduaren 17ko 689/1991 Dekretuaren arabera (hurrenez hurren, Euskal Autonomia Erkidegoko Herri Ogasun Nagusiaren Antolarauei buruzko Legearen Testu Bategina onartzen duen azaroaren 11ko 1/1997 Legegintzako Dekretua eta Euskal Autonomia Erkidegoaren

aurrekontu orokorren kargura ematen diren diru-laguntzen bermeei eta horiek itzultzeari buruzko erregimen orokorra arautzen duen abenduaren 17ko 698/1991 Dekretua).

AZKEN XEDAPENAK

Lehenengoa.— Agindu honetan aurreikusi gabeko alderdietan, Euskal Autonomia Erkidegoko Ogasun Nagusiaren Antolarauei buruzko Legearen Testu Bategineko VI. titulua (azaroaren 11ko 1/1997 Legegintzako Dekretuaren bidez onartu zena) eta Herri Administrazioen Araubide Juridikoaren eta Administrazio Prozedura Erkidearen azaroaren 26ko 30/1992 Legea aplikatuko dira.

Bigarrena.— Administrazio-bidea amaitzen duen agindu honen aurka, interesdunak aukerako berraztertze-errekurtsoa jar diezaioke Kulturako sailburuari (azaroaren 26ko 30/1992 Legearen 116. artikulua), hilabeteko epean, Euskal Herriko Agintaritzaren Aldizkarian argitaratu eta hurrengo egunetik aurrera, edo, bestela, zuzenean administrazioarekiko auzi-errekurtsoa jar dezake Euskal Autonomia Erkidegoko Auzitegi Nagusian, Administrazioarekiko Auzietako Salan, bi hilabeteko epean, agindu hau Euskal Herriko Agintaritzaren Aldizkarian argitaratu eta hurrengo egunetik aurrera (uztailaren 13ko 29/1998 Legearen 10. artikulua).

Hirugarrena.— Agindu hau Euskal Herriko Agintaritzaren Aldizkarian argitaratu eta hurrengo egunean jarriko da indarrean.

Vitoria-Gasteiz, 2012ko ekainaren 12a.

Kulturako sailburua,
MARÍA BLANCA URGELL LÁZARO.